

ԳԱՆԱՏԱՅԻ ՀԱՅՈՑ ԹԵՄԻ ԱԶԳԱՅԻՆ ԱՌԱՋՆՈՐԴԱՐԱՆԻ ԿՐՕՆԱԿԱՆ ԱՄՍԱԹԵՐԹ

ԱՌԱՋՆՈՐԴԻ ԽՕՍՔ

Ս. ԳՐԻԳՈՐ ԼՈՒՍԱԽՈՐԻՉԻ ՄՈՒՏՆ Ի ՎԻՐԱՊՆ ՏՕՆԸ՝ ՈՒԽՏԻ ՕՐ ԱՆԹԻԼԻԱՄԻ



28 Մարտին, Հայց. Առաքելական Ս. Եկեղեցին պիտի տօնէ Ս. Գրիգոր Լուսաւորիչի Մուտն ի Վիրապն տօնը, իսկ 29 Մարտին՝ Ուխտի օր Անթիլիասի։

Այս գոյգ տօները ո՛չ միայն մեր անցեալին պատկանող պատմական դէպքերու քննութեան օրեր են, այլև՝ մեր հաւատարմութեան և քրիստոնէական ուխտին ներհայեցողական ակնարկով նայելու օրեր՝ Հայց. Առաքելական Ս. Եկեղեցիին հանդէպ մեր հաւատքը ամուր պահելու համար։

Ս. Գրիգոր Լուսաւորիչ Հայրապետ Քրիստոսի հանդէպ ունեցած իր հաւատքով ու իր աղօթքներով կրցաւ տոկալ Խոր Վիրապի 13 տարիներու գրկանքներուն ու չարչարանքին։

Քրիստոսի հաւատքով զօրացած, ան դարձաւ Հայաստան աշխարհը

այլակերպող լուսածաղկեալ գաւազանը, և այդ հաւատքն էր, որ կարելիութիւն ընծայեց կարգաւորելու մեր Մայրենի Եկեղեցին՝ Առաքելական Ս. Եկեղեցին։

Ինչպէս Քրիստոս փարատեց այս աշխարհի խաւարը, նոյնպէս ալ Ս. Գրիգոր Լուսաւորիչ յաղթանակելով Խոր Վիրապի խաւարին՝ լոյս սփռեց Հայոց համայն աշխարհին։ Ան Ս. Թադէոսի և Ս. Բարթողիմէոսի առաքելութեան կնիքը հանդիսացաւ, միննոյն ժամանակ, սկիզբ դրաւ նոր առաքելութեան մը, որ պիտի շարունակուէր մեր Ս.Թարգմանիչներու՝ Ս.Սահակի և Ս.Մեսրոպի միջոցով, իր ներկայութիւնը պիտի հաստատէր Տէր Զօրի, Սարդարապատի և մինչև իսկ ներկայ մեր ժամանակներուն մէջ։

Ս. Գրիգոր խաւարի դէմ իր տարած յաղթանակով, ամբողջովին յեղաշրջեց Հայոց աշխարհն ու հայութեան նկարագիրը

Այսօր, մենք ևս, որպէս ազգ և մարդկութիւն, կը գտնուինք հաւատքի պահպանման միևնոյն պայքարին մէջ։ Ներկայ ժամանակներուն թշնամին անտարբերութիւնն է, որ դէպի ետ կը մղէ ժողովուրդը և կը կասեցնէ անոր յառաջխաղացքը դէպի Ս. Գրիգորի պատրաստած **Լոյսի Բնակարանը՝ դէպի Եկեղեցին Հայոց։**

Այսօր մենք պէտք է վերանորոգենք մեր հաւատքը, վերանորոգենք մեր հաւատարմութիւնն ու նուիրումը, երդուելով միշտ վառ պահել մեր եկեղեցւոյ, ազգութեան ու ժողովուրդին սուրբ ճրագը։

Հետևաբար, այս տօնը ոչ միայն ոգեկոչման ու յիշեցումի առիթ է, այլև՝ մեր հաւատքի ճրագը վառ ու ճառագայթող պահելու ուխտի օր, որովհետև առանց այդ հաւատքի լոյսին՝ մեր կեանքը խաւարի մէջ կորսուելու ենթակայ կ'ըլլայ։

Ձեր հաւատքը միշտ կանգուն և ուժեղ մնայ, իսկ ձեր հոգիները՝ լոյսի անկարօտ։

Թող Ս. Գրիգոր Լուսաւորիչի հաւատքի լոյսը միշտ անմար մնայ և յալիտեանս տարածուի Հայոց աշխարհի մէջ։

ԲԱՐԳԷՆ ԱՐՔԵՊԻՍԿՈՊՈՍ ՉԱՐԵԱՆ

ԽՄԲԱԳՐԱԿԱՆ



Հայ Եկեղեցին մէկ մասն է Քրիստոնէական Ընդհանուր Եկեղեցւոյ։

Քրիստոնէութիւնը ամբողջ աշխարհին մէջ տարածուած երկու-հազարամեայ կրօնք մըն է։

Բացի կրօնական իր նկարագրէն և դերակատարութենէն, Հայաստանեայց Եկեղեցին ունի նաև Ազգային դիմագիծ և սերտօրէն կապուած է Հայութեան կեանքին՝ թէ՛ անցեալին և թէ՛ ներկայի։ Այս պատճառով ալ անհրաժեշտ է սերտել Հայ Եկեղեցւոյ պատմութիւնն ու կառոյցը լաւ հասկնալու համար Հայ ժողովուրդին քաղաքական և քաղաքակրթական կեանքն ու պատմական հոլովոյթը։

Հայոց պատմութեան էջերէն գիտենք, որ Եկեղեցին շատ կարևոր ազդեցութիւն և դերակատարութիւն ունեցած է մեր մտաւոր զարգացումին (գրականութիւն և արուեստներ) և քաղաքական ու ընկերային կեանքին մէջ։

Հայ Եկեղեցին այնքան սերտօրէն շաղուած է հայ կեանքին հետ, որ յաճախ դժուար է իրարմէ անջատել ազգային պատմութիւնն ու Հայ եկեղեցւոյ պատմութիւնը։



ՈՒՍԱԴՈՐԻՉ

ՄԵԾ ՊԱՀՔԻ ՀՈԳԵՊԱՐԱՐ ԿԻՐԱԿԻՆԵՐԸ

Ա. ԲՈՒՆ ԲԱՐԵԿԵՆԴԱՆ



Մեծ Պահքը կը սկսի Բուն Բարեկենդանի յաջորդ օրը՝ Երկուշաբթի, և կ'երկարի մինչև Ս. Յարութեան Աւագ Շաբաթը:

Աւագ Շաբաթը ևս պահքի շաբաթ ըլլալով, Մեծ Պահքի ընդհանուր տևողութիւնը կը հասնի եօթը (Յարութեան տօնին հետ միասին) շաբաթի կամ 48 օրուան:

Մեծ Պահքը հոգեկան վերանորոգութեան և մեր Փրկչին Յիսուսի Քրիստոսի հրաշափառ Յարութեան պատրաստուելու սքանչելի առիթ մըն է, եթէ անիկա գիտակցօրէն ապրուի:

Բուն Բարեկենդանի Կիրակին նուիրուած է Դրախտի Յիշատակին, երբ նախամարդը դրախտի փափկութեան մէջ կ'ապրէր երջանիկ, և Աստուծոյ մշտական ներկայութիւնը կը վայելէր: Բուն Բարեկենդանի Ս. Գրային ընթերցումները մեզի կը յիշեցնեն, թէ հնազանդութեամբ, պահեցողութեամբ, պատուիրանապահութեամբ և աղօթանուէր կեանքով, դրախտէն արտաքսուածներս վերստին կրնանք դրախտային կեանք ժառանգել:

Գ. ԱՆԱՌԱԿԻ ԿԻՐԱԿԻ



Մեծ Պահքի երրորդ Կիրակին կը կոչուի Անառակի Կիրակի, ըստ Դուկասի Աւետարանին մէջ յիշատակուող «Անառակ Որդի»ի առակին (Դուկ. 15.11-32):

Այս Առակը կը պատմէ մարդու անկման ու ապա վերելքի պատմութիւնը՝ խորհրդանշելով պահքն ու զղջացող անձի փրկութիւնը:

Անառակի Կիրակի օրը կարդացուող ավետարանական հատուածին մէջ կը խօսուին կորսուած դրամի, ոչխարի, բայց և մանաւանդ կորսուած Անառակ Որդիին մասին:

Հայր Աստուած իր հրեշտակներուն հետ կ'ուրախանայ բոլոր այն մեղաւորներուն համար, որոնք զղջալով կ'ապաշխարեն: Անառակի Կիրակին մեզի կ'ուսուցանէ Աստուածային ներողամտութեան և անհուն սիրոյն մասին, յիշեցնելով, որ Երկնաւոր Հայրը միշտ պատրաստ է ներելու, վերստին որդեգրելու՝ սխալներուն անդրադարձող, զղջացող և տուն վերադարձող բոլոր մեղաւորները:

Բ. ԱՐՏԱՔՍՄԱՆ ԿԻՐԱԿԻ



Մեծ Պահքը երկրորդ Կիրակին կը կոչուի Արտաքսման Կիրակի. կապուած է Աստուածաշնչական այն դրուագին, ուր կը պատմուի նախամարդուն՝ Ադամի և Եւայի անհնազանդութիւնն ու դրախտէն արտաքսուիլը:

Ադամը չպահելով Տիրոջ պատուիրանները, մեղանչեց և զրկուեցաւ Աստուածային վայելուչ փառքէն ու արտաքսուեցաւ դրախտէն:

Այս օրուան Ս. Գրային ընթերցումները մեզի կը յիշեցնեն, թէ երբ մեր նախաձնողաց նման մեղանչենք և անհնազանդ գտնուինք Աստուծոյ օրէնքներուն՝ մենք ալ պիտի արտաքսուինք և զրկուինք Աստուծոյ ներկայութենէն:

Իբրև մարդ էակ, կը դիմագրաւենք ներքին ու արտաքին փորձութիւններ. եթէ անտեսենք Քրիստոսի ապաշխարութեան և փրկութեան հրաւերը և փորձենք մեր նախաձնողաց նման չքմեղանքի տերևներու ետին պահուիլով, այդ ժամանակ ինքնախաբէութեան և ինքնարդարացման պատրուակները պատճառ պիտի ըլլան, որ մենք ալ Աստուծմէ հեռանանք և իր շնորհքներէն զրկուինք:

Դ. ՏՆՏԵՍԻ ԿԻՐԱԿԻ



Չորրորդ Կիրակին կը կոչուի Տնտեսի Կիրակի, ըստ Դուկասի Աւետարանին մէջ յիշատակուող «Անիրաւ Տնտես»ի առակին (Դուկաս 16.1-13):

Այս առակը մեզի կ'ուսուցանէ խոհեմութեամբ շահարկել ժամանակն ու երկրաւոր ստացուածքները, որոնք մեզի չեն պատկանիր և մենք անոնց վրայ նշանակուած ենք տնտես՝ վերակացուներ:

Աստուած մեզի վստահած է այս աշխարհը և օր մը մեզմէ հաշիւ պիտի պահանջէ. Հետևաբար, մեզմէ կ'ակնկալէ, որ այնպէս ինչպէս մենք հետամուտ ենք երկրաւոր բարիք, հարստութիւն և երջանկութիւն ապահովելու, նոյնքան և ատելի խոհեմութիւն, ճիգ, հնարք և աշխատանք տանինք հոգևոր շնորհք վաստակելու համար՝ արժանանալով երկնային անսպառ գանձերը տնտեսելու պաշտօնին և արքայութեան մէջ յաւիտենական կեանքը ժառանգելու հնարաւորութեան:



ՄԵԾ ՊԱՀՔԻ ՀՈԳԵՊԱՐԱՐ ԿԻՐԱԿՆԵՐԸ

Ե. ԴԱՏԱՌՈՐԻ ԿԻՐԱԿԻ



Մեծ Պահքի հինգերորդ Կիրակին կը կոչուի Դատարի Կիրակի՝ քաղուած Դուկասի Աւետարանէն (Բկ. 18.1-8), որ կը պատմուի անիրաւ դատարին առակը, որ կը մերժէր այրի կնոջ դատը տեսնել, սակայն կնոջ յարատւ դիմումներուն տեղի տալով՝ ի վերջոյ կ'որոշէ ընդունիլ կնոջ դատը:

Այս առակը մեզի կը յիշեցնէ աղօթքի մէջ յարատւելու անհրաժեշտութիւնը և կը յորդորեն մեղքով արատաւորուած մարդկային մեր բնութիւնը սրբելու, մաքրելու՝ վերջին Դատաստանի դատապարտութենէն ազատելու և արդարանալու նպատակով:

Աստուծոյ պէտք է անձանձրոյթ աղօթել, գղջումով և ապաշխարութեամբ դուռը զարնել ու բնաւ չյուսահատիլ, ապաւինելով Աստուծոյ անաչառութեան, գթառատութեան և ողորմածութեան, բայց մանաւանդ քաջ գիտնալ, որ Աստուծոյ յուսացողը բնաւ անհատոյց և անպատասխան չի մնար:

Զ. ԳԱԼՍՏԵԱՆ ԿԻՐԱԿԻ




Մեծ Պահոց վեցերորդ Կիրակին կը կոչուի Գալստեան Կիրակի:

Այս օրուան Աւետարանական ընթերցումներն ու շարականները մեզի կը յիշեցնեն յարուցեալ մեր Փրկչին երկրորդ գալստեան և վերջին դատաստանին մասին:

Յարուցեալ Տէրը վերստին աշխարհ պիտի գայ, որպէս Արդար Դատար՝ դատելու ողջերն ու մեռեալները, հատուցանելով ըստ մեր գործերուն ու արարքներուն:

Քրիստոնեաներուս համար, Գալստեան Կիրակին վերյիշեցում մըն է և հաստատում, թէ Քրիստոս՝ բացարձակ և միակ Տէրն է անցեալին, ներկային ու գալիք բոլոր ժամանակներուն: Մենք միշտ պատրաստ պէտք է ըլլանք **ՄԵՐ ՏԻՐՈՋ ՅԻՍՈՒՍ ՔՐԻՍՏՈՍԻ ԵՐԿՐՈՐԴ ԳԱԼՈՒՍՏԻՆ ՈՒ ԴԱՏԱՍՏԱՆԻՆ:**



ԵՐԻՏԱՍԱՐԴԱԿԱՆ ՈՒՆՏԱՅՑ ԴԷՊԻ ՀԱՅՐԵՆԻՔ

YOUTH MISSION TRIP: ARMENIA

Հովանաւորութեամբ
Գերաշնորհ Տ. Բաբգէն Արք. Չարեանի
Առաջնորդ Գանատայի Հայոց Թեմի

Կազմակերպութեամբ՝ Ազգային Առաջնորդարանի
Երիտասարդական Բաժանմունքին

ԵՐԻՏԱՍԱՐԴԱԿԱՆ ԱՅՑ ԴԷՊԻ ՀԱՅՐԵՆԻՔ
18-35 տարեկաններու համար
26 ՅՈՒՆԻՍ - 12 ՅՈՒԼԻՍ 2020

Մասնակցութեան սակ՝ \$2,000 (առաւել թոյիչք)
Հեռաձայնեցէք՝ 514-856-1200 թիւին
Գրեցէք՝ vicar@armenianprelacy.ca

Under the Auspices of
His Eminence Archbishop Papken Tcharian
Prelate of Canada

Organized by the Youth Ministry of the Armenian Prelacy


YOUTH MISSION TOUR: ARMENIA
For the Youth aged 18-35
June 26 - July 12, 2020

Participation fee: \$2,000 (plus airfare)
For more information call 514-856-1200
E-mail: vicar@armenianprelacy.ca



ՌԻՍԱԲՈՐԻՉ

Ս. ՔԱՌԱՄՆԻՑ ՄԱՆԿԱՆՑ



Ս. Քառասնից մանկանց տօնը յիշատակումն է Դ. դարու սկզբնաւորութեան նահատակուած քառասուն վկաներու, որոնք Փոքր Հայքի տարբեր քաղաքներէն եկած քրիստոնեայ զինուորներ էին ու կը ծառայէին Սեբաստիոյ մէջ հաստատուած հռոմէական կայսերական զունդին:

Լիկիանոս կայսեր հրամանով Կեսարիոյ դուքսը՝ Լիսիաս հալածանքներ կը ծաւալէ քրիստոնեայ զինուորներուն դէմ, անոնք հաւատարիմ կը մնան իրենց հաւատքին, կը բանտարկուին և դատական ատեան կը հանուին:

Անոնք քարկոծման կ'ենթարկուին, սակայն Աստուծոյ հրաշքով, արձակուած քարերը հակառակ ուղղութեամբ կը տեղան և կը վիրաւորեն դատաւորն ու պահակագունդի զինուորները:

Այնուհետև, իբրև պատիժ, ձմեռնային ցուրտ գիշեր մը, անոնք կը նետուին Սեբաստիոյ մօտ լիճք մը: Անոնցմէ միայն մէկը չղիմանալով տանջանքներուն, դուրս կ'ելլէ ջուրէն, կը փորձէ փրկութիւն գտնել լճափին կառուցուած տան մը մէջ, սակայն կը մեռնի ու կը զրկուի երկնային կեանքէն:

Առաւօտուն, երեսուն և ինը նահատակները կ'երևին լուսէ պսակներով: Պահապան զինուորներէն մէկը, տեսնելով հրաշքը, դարձի կու գայ և կամովին կը նետուի լիճ՝ պսակակից դառնալով անոնց:

Անոնց նշխարները կ'ամփոփուին Սեբաստիոյ մէջ, ուր կը կառուցուի «Քառասուն Մանկունք» քառասուն գմբեթանի տաճարը, որ կանգուն կը մնայ մինչև Լենկթիմուրի արշաւանքը:


Քառասուն Մանկանց պատմութիւնը կը յորդորէ քրիստոնեայ հաւատացեալը՝ կեանքի բոլոր դժուարութիւններուն մէջ հաւատարիմ մնալ քրիստոնէական հաւատքին և դէմ դնել ամէնէն ծանր դժուարութիւններուն, երկնային պսակին արժանանալու համար:

ՄԱՆԿԱՊԱՏԱՆԵԿԱՆ

«Բարի Նամարացի» կը կոչենք այն բարի օրարականը, որ օգնեց գողութեան ենթարկուած մարդուն:

Կարդա՛ այս պարմութիւնը Դուկաս 10րդ գլուխի 25-37րդ Բամարներուն մէջ:

Գիծերուն Բերելէ՛ եւ գորի՛ր Եիշտ պանդուկը, ուր պիտի բժշկուի Բիւանդ մարդը:



Ազգային Առաջնորդարան
Armenian Prelacy of Canada
Prelature Armenienne du Canada



514-856-1200
prelacy@armenianprelacy.ca
www.armenianprelacy.ca



Խմբագիր՝ Քրիստափոր Միքայէլեան
3401 Olivar Asselin
Montreal, Quebec H4J 1L5